

በስመ፡ አብ፡ ወወልድ፡  
ወመንፈስ፡ ቅዱስ፡ አሐ  
ዱ፡ አምላክ፡ ተአምሪሃ፡  
ለእግዚእትነ፡ ቅድስት፡  
ድንግል፡ በክልኤ፡ ማርያም፡  
ም፡ ወላዲተ፡ አምላክ፡  
ጸሎታ፡ ወብረከታ፡ ወም  
ሕረተ፡ ፍቁር፡ ወልዳ፡ የ  
ሀሉ፡ ምስለ፡ ገብራ፡ እር  
ካሌድስ፡ ፡ ለዓለ  
መ፡ ዓለም፡ አሜን፡ ተ  
ብህለ፡ ከመ፡ ሀሎ፡ በቤተ፡  
ክርስቲያን፡ ዘሀገረ፡ ጥ  
ልጥልያ፡ ኤጲስ፡ ቆጶስ፡  
ዘስሙ፡ ደቅስዮስ፡ ወኮ  
ነ፡ ብእሴ፡ ቡሩክ፡ ውኄረ፡

ወያፈቅራ፡ ለእግዚእትነ፡  
ቅድስት፡ ድንግል፡ በክል  
ኤ፡ ማርያም፡ ወላዲተ፡ አ  
ምላክ፡ በኩሉ፡ ልቡ፡ ወይ፡  
ትለአካ፡ በኩሉ፡ ክሂሎቱ፡  
ወምንደተ፡ ፍቅሩ፡ ገብ  
ረ፡ ላቲ፡ ወአስተጋብአ፡ መ  
ጽሐፈ፡ ተአምሪሃ፡ ወአ  
ስተርአየቶ፡ እግዚእትነ፡  
ቅድስት፡ ድንግል፡ በክል  
ኤ፡ ማርያም፡ አክሊሎሙ፡ ለ  
መኃይምናን፡ ወነሥአት፡  
መጽሐፈ፡ በእዴሃ፡ ወት  
ቤሎ፡ አፍቅርየ፡ ደቅስዮ  
ስ፡ አንሰ፡ ሠምርኩ፡ ብከ፡

ወንዕድኩከ፡ በእንተ፡ ዘ  
ገበርከ፡ ሊተ፡ ዘንተ፡ መ  
ጽሐፈ፡ ወእምዝ፡ ተሠ  
ወረት፡ እምኔሁ፡ ወሶበ፡  
ርእየ፡ ኤጲስ፡ ቆጶስ፡ ዘ  
ንተ፡ ግብረ፡ እምራእይ፡  
እምፍቅራ፡ ለእግዚእት  
ነ፡ ቅድስት፡ ድንግል፡ በክ  
ልኤ፡ ማርያም፡ ወላዲተ፡  
አምላክ፡ ተፈሥሐ፡ ዐቢ  
የ፡ ፍሥሐ፡ ወነደ፡ ልቡ፡ ከ

መ፡ እሳት፡ በእንተ፡ ፍቅራ፡  
ወኮነ፡ ይሔሊ፡ ዘከመ፡ ይ  
ገብር፡ ምንተ፡ ከመ፡ ይወ  
ስክ፡ ወያፈድፍድ፡ ክብረ፡  
ዚአሃ፡ ወገብረ፡ በዕለ፡ በ

ዘዜነዋ፡ ገብርኤል፡ ዘኢ  
ተክህሎሙ፡ ይግበርዎ፡  
ቀዳሚ፡ በውእቱ፡ ጊዜ፡ በ  
እንተ፡ ጾም ፊ ወረሰየ፡ ው  
እቱ፡ እምቅድመ፡ በዐለ፡  
ልድድት፡ ስቡሕ፡ በሰመን  
ቱ፡ መዓልት ፊ ዝውእቱ፡  
አመ፡ እስራ፡ ወሰኑዩ፡ ለ  
ታኅሣሥ ፊ ወተሠርዓ፡  
በመዋዕለ፡ ጳጳስናሁ፡ እ  
ስክ፡ ዛቲ፡ ዕለት ፊ ወሶበ፡ አ  
ብዐልዎ፡ ሰብእ፡ ተፈሥ  
ሑ፡ ዐቢየ፡ ፍሥሐ ፊ ወአ  
ስተርአየቶ፡ እግዝእትነ፡  
ቅድስት፡ ድንግል፡ በክል  
ኤ፡ ማርያም፡ ወላዲተ፡ አ

ምላክ፡ መፍቀሪተ፡ ምሕ  
ረት፡ ውኒሩት፡ ወሠናያ  
ት፡ ወውስተ፡ እደሃ፡ ልብ  
ስ፡ ክቡር ፊ ወትቤሎ፡ አፍ  
ቁርየ፡ ደቅስዮስ፡ ወላእ  
ክየ፡ ዘበአማን ፊ አንሰ፡ ን  
ዕድኩክ፡ ወተፈሣሕኩ፡  
ብክ፡ ወሠመርኩ፡ እብግብ  
ርክ ፊ ወበከመ፡ ተፍረሣሕ  
ክ፡ ብየ፡ ወገበርክ፡ ሊተ፡ በ  
ዕለ፡ በብስራተ፡ ገብርኤ  
ል፡ መልአክ፡ ዘአብስረኒ  
ወአስተፍሣሕክ፡ ኩሎ፡  
ሰብእ፡ በእንቲአየ ፊ አንሰ፡  
እፈቅድ፡ እዕሢክ፡ ወአክ  
ብርክ፡ በዝ፡ ዓለም፡ በቅድ

መ፡ ኩሎ፡ ሰብእ ፊ በከመ፡  
አክብርክኒ፡ አንተ ፊ ወናሁ፡  
አምጸእኩ፡ ለክ፡ ዘንተ፡ ል  
ብሰ፡ ከመ፡ ትልበስ፡ ኪያሃ ፊ

ወዘንተ፡ መንበረ፡ ከመ፡ ት  
ንበር፡ ዲቤሁ❖ ወአልቦ፡ አ  
ሐዱ፡ እምሰብእ፡ ዘይክል፡  
ይልበስ፡ ወንበር፡ ዲበ፡  
ዛቲ፡ መንበር❖ ወለእመ  
ቦ፡ ዘተዐደወ፡ ዘንተ፡ ቃል  
የ፡ ዘቤለከ፡ አንሰ፡ እትቤ  
ቀል፡ ኪያሁ❖ ወዘንተ፡ ብ  
ሂላ፡ ተሠወረት፡ እምኔሁ❖  
ወሶበ፡ ተፈጸመ፡ መዋዕለ፡  
ሕይወቱ፡ ፈለሰ፡ እምዝን  
ቱ፡ ዓለም፡ ኅበ፡ ምሕረተ፡

እግዚአብሔር፡ ልዑል፤  
ወአንበርዋ፡ ለይእቲ፡ ል  
ብስ፡ ውስተ፡ ቤተ፡ መዛ  
ግብት፡ ዘቤተ፡ ክርስቲያ  
ን፡ በዐቢይ፡ ክብር፡ ወንጽ  
ሕና❖ ወሶበ፡ ተሠይመ፡  
እምድኅራሁ፡ ካልእ፡ ኤ  
ጲስ፡ ቆጶስ፡ ፈቀደ፡ ይል  
በሳ፡ ለይእቲ፡ ልብስ❖ ወ  
ይንበር፡ ዲበ፡ መንበሩ፡  
ለውእቱ፡ ኤጲስ፡ ቆጶስ፡  
ደቅስዮስ❖ ወአጠየቅዎ፡  
ቀሳውስት፡ ዘቤተ፡ ክርስ  
ቲያን፡ ወሊቃውንቲሃ፡ ክ  
ብራ፡ ለይእቲ፡ ልብስ❖ ወ  
ይቤልዎ፡ በእንተ፡ እግዚ

አብሔር፡ ኢትግበር፡ ዘን  
ተ፡ ግብረ❖ ወይቤሎሙ፡  
አነ፡ ሰብእ፡ ከመ፡ ውእቱ፡  
ወኢኮንኩኑ፡ ኤጲስ፡ ቆ  
ጶስ፡ ከመ፡ ውእቱ፡ ኤጲስ  
ቆጶስ❖ አንሰ፡ እፈቅድ፡ ከ  
መ፡ እልበሳ፡ ለይእቲ፡ ል  
ብስ፡ ወእንበር፡ ዲበ፡ መን  
በረ፡ ዚአሁ❖ ወኢትክህ  
ሎሙ፡ ይትዓደውዎ❖ ወ  
ሶበ፡ ለይእቲ፡ ልብስ፡ ወነ  
በረ፡ ዲበ፡ መንበር፡ ወድ  
ቀ፡ በጊዜሃ፡ እምላዕለ፡ ው  
እቱ፡ መንበር፡ በቅድመ፡

ኩሉ፡ ሰብእ፡ እለ፡ ሀለወ፡  
ውስተ፡ ቤተ፡ ክርስቲያን❖

ወሞተ፡ በእኩይ፡ ሞት፡ ወ  
ሕሱም፡ ፈድፋደ❖ ወአ  
ንከሩ፡ ኩሉሙ፡ እለ፡ ሀ  
ለዉ፡ ውስተ፡ ቤተ፡ ክርስ  
ቲያን፡ እምዛቲ፡ ተአም  
ር፡ እንተ፡ ኮነት❖ ወሰብ  
ሕዎ፡ ለእግዚአብሔር፡  
ስቡሕ፡ ወልዑል❖ ወአእ  
ኩትዋ፡ ለእግዝእትነ፡ ቅ  
ድስት፡ ድንግል፡ በክልኤ፡  
**ማርያም**፡ ወላጇተ፡ አም  
ላክ❖ በእንተ፡ ዘገብረት፡ ተ  
አምረ፡ ወመንክረ፡ ፈር  
ህዋ፡ ወአፈድፈዱ፡ መል  
እክታ፡ ወክብራ❖ ጸሎታ፡  
ወበረከታ፡ ወምሕረተ፡ ፍ

ቁር፡ ወልዳ፡ የሀሉ፡ ምስለ፡  
አመ፡ ታፈውን፡  
ለዓለመ፡ ዓለም፡ አሜን❖

.....  
**ወሶበ፡ ጸሐፊ፡ ደቅስዮስ፡**  
ተአምሪሃ፡ ዕሉደ❖ ወዮም  
ኬ፡ ተዝካራ፡ አግሀደ❖ ወ  
ሀበቶ፡ ልብስ፡ ወመንበረ፡  
አሐደ❖ ገብርኤል፡ አብስ  
ራ፡ ብስራተ፡ ፍሥሐ፡ ብዑ  
ደ❖ በድንልና፡ ፀኒስ፡ ወ  
ወሊደ፡ **ወልደ**❖

.....  
**አኮኑ፡ ብእሲ፡ ሶበ፡ ሐኒጸ፡**  
ቤት፡ አፍተዎ❖ ኩሉ፡ ፃእ፡  
ፃእ፡ ያቀድም፡ አስተዳል

ዎ❖ እስእለኪ፡ ሀብኒ፡ መ  
ንፈስ፡ ጥበብ፡ ወአለብዎ❖  
መንክራተኪ፡ **ማርያም**፡  
ሶበ፡ ፈቀድኩ፡ ዜንዎ❖ ወ  
ለሠናይትኪ፡ ረትዓኒ፡ እ  
ትልዎ❖

.....

፪፩ ተአምሪሃ፡ ለእግዝእ  
ትነ፡ ቅድስት፡ ድንግል፡ በ  
ክልኤ፡ ማርያም፡ ወላዲተ፡  
አምላክ፡ ጸሎታ፡ ወበረ  
ከታ፡ ወምሕረተ፡ ፍቁር፡  
ወልዳ፡ የሀሉ፡ ምስለ፡ ገብ  
ራ፡ አርከሌድስ፡ ለ  
ዓለመ፡ ዓለም፡ አሜን፡  
ወሀሎ፡ አሐዱ፡ ብእሲ፡ ገ  
ባራዊዝ፡ እያፈቅራ፡ ለእግ  
ዝእትነ፡ ማርያም፡ ወላ  
ዲተ፡ አምላክ፡ በኩሉ፡ ል  
ቡ፡ ወያወትር፡ አንብቦ፡  
ሰላማ፡ ለለኩሉ፡ ዕለት፡ ነ  
ግሀ፡ ወቀትረ፡ ወምሴተ፡  
ወነበረ፡ ከመዝ፡ ብዙኃ፡

መዋዕለ፡ ወአሐተ፡ ዕ  
ለተ፡ ይቤላ፡ አእግዝእ  
ትየ፡ መስተሣህልት፡ ና  
ሁ፡ አንሰ፡ እሁበኪ፡ ሰላ  
መ፡ መልአክ፡ ወትረ፡ ወ  
አንቲሰ፡ ኢታገብኢ፡ ሊ  
ተ፡ ሰላምየ፡ ወእምዝ፡  
ሶበ፡ ወጠነ፡ ያንብብ፡ ሰ  
ላመ፡ እግዝእትነ፡ ማር  
ያም፡ ወበጽሐ፡ ኅበ፡ ይብ  
ል፡ ቡርክት፡ አንቲ፡ አም  
አንስት፡ ወተሰጥወቶ፡  
እግዝእትነ፡ ቅድስት፡ ድ  
ንግል፡ በክልኤ፡ ማርያ  
ም፡ ወላዲተ፡ አምላክ፡ እ  
ምውስተ፡ ሥዕል፡ እንዘ፡

ትብል፡ ቡሩክ፡ አንተኒ፡  
እምዕደው፡ ወከመዝ፡  
ትቤሎ፡ ሠለስተ፡ ጊዜ፡  
ወሶበ፡ ሰምዓ፡ ውእቱ፡ ገ  
ባራዊ፡ ዘንተ፡ ቃለ፡ እም  
ሥዕል፡ እግዝእትነ፡ ቅድ  
ስት፡ ድንግል፡ በክልኤ፡  
ማርያም፡ ወላዲተ፡ አም  
ላክ፡ ሰገደ፡ በገጹ፡ ቅድሜ  
ሃ፡ ወነስሐ፡ በእንተ፡ ዘተ

ሀበለ፡ ተናግሮታ፡ ❖ ወባሕ  
ቱ፡ ተፈሥሐ፡ በበይነ፡ ቃ  
ል፡ ዘነበበቶ፡ ወአፈድፈ  
ደ፡ አፍቅሮታ፡ እምቀዲ  
ሙ፡ ወወሰከ፡ ዓዲ፡ ተል  
እኮታ፡ እስከ፡ እፍለሰ፡ እም

ዝንቱ፡ ዓለም፡ ኃላፊ፡ ❖ ጸ  
ሎታ፡ ወበረከታ፡ ወምሕ  
ረተ፡ ፍቁር፡ ወልዳ፡ የሀሉ፡  
ምስለ፡ ስምታ፡ ዓቢይ፡  
**ይሄሉ፡ ለዓለሙ፡ ዓለ**  
**ም፡ አሜን፡ ❖**

.....

**ሶበ፡ ወሀበኪ፡ ዘልፈ፡ ሰ**  
ላሙ፡ መልአክ፡ ብስራታ  
ዊ፡ ❖ ፍቁርኪ፡ ገባራዊ፡ ❖  
ከሙ፡ ባረኪዮ፡ ቅድመ፡  
**ማርያም፡ መጽሐፈ፡ ሐ**  
**ዊ፡ ❖ ባርክኒ፡ እግዝእትየ፡**  
ምስለ፡ ወልድኪ፡ ናዝራ  
ዊ፡ ❖ በበረከቶሙ፡ ለይሁ  
ዳ፡ ወሌዊ፡ ❖

**፫፩ ተ፡ ተአምሪሃ፡ ለእግዝ**  
**እትነ፡ ቅድስት፡ ድንግል፡**  
በክልኤ፡ **ማርያም፡ ወላ**  
ዲተ፡ አምላክ፡ ❖ ጸሎታ፡  
ወበረከታ፡ ወምሕረተ፡  
ፍቁር፡ ወልዳ፡ የሀሉ፡ ም  
ስለ፡ ገብራ፡ አር  
ከሌድስ፡ ለዓለሙ፡ ዓለም፡  
አሜን፡ ❖ ወሀሎ፡ አሐዱ፡  
ብእሲ፡ ዕብራዊ፡ ዘልህ  
ቀ፡ በሀገረ፡ አክሚም፡ ወ  
ያፈቅራ፡ ለእግዝእትነ፡  
**ማርያም፡ ወላዲተ፡ አም**  
**ላክ፡ ❖ እምሥርወ፡ ልቡ፡**  
ወኢያፀርእ፡ እምአፉሁ፡  
ዝክረ፡ ስማ፡ በፍርሀት፡ ወ

በረዓድ፡ ❖ ወበጊዜ፡ ይሰግ  
ድሂ፡ ይኤምኅ፡ በእንተ፡ ክ  
ብረ፡ ስማ፡ ❖ ወካህን፡ ብእ

ሲሁ፡ ውእቱ፡ ወይትለአክ፡  
በንጹሕ፡ ጊዜ፡ ዕጣን፡ ወ  
ቅርባን ❖ ወሶበ፡ ጎለፈ፡  
መዋዕለ፡ ውርዙቱ፡ ረስ  
ዓ፡ ወኮነ፡ ጉሕቄ፡ ወኃጥ  
አ፡ ኃይለ፡ ወስእነ፡ ቀዊመ ❖  
ወሶበ፡ አእመረ፡ ሊቀ፡ ጳ  
ጳሳት፡ ከመ፡ ደክመ፡ ወስ  
እነ፡ ተልእኮ ❖ ደመረ፡ ሎ  
ቱ፡ ክልኤተ፡ ዲያቆናተ፡ ከ  
መ፡ ይትለአክዎ ❖ ወአሐ  
ተ፡ ዕለተ፡ እንዘ፡ ይሴብሕ፡  
ስማ፡ ለእግዝእትነ፡ ቅድ

ስት፡ ድንግል፡ በክልኤ፡  
**ማርያም**፡ ወላዲተ፡ አም  
ላክ፡ ሰገደ፡ ዲበ፡ ምድር፡  
ወወድቀ፡ በእንግድዓሁ፡ ወ  
ተሰብረ፡ አጽመ፡ ዘባኑ ❖  
ወጸርሐ፡ በልዑል፡ ቃል፡  
ወይቤ፡ አ፡ እግዝእትየ፡ ቅ  
ድስት፡ ድንግል፡ በክልኤ፡  
**ማርያም**፡ ወላዲተ፡ አም  
ላክ፡ ንዲ፡ ርድእኒ፡ እም  
ድቀትየ ❖ ወበጊዜሃ፡ ተ  
ርእየቶ፡ እግዝእትነ፡ ቀ  
ዊማ፡ በየማነ፡ ምሥዋዕ፡  
ወመጠወቶ፡ እዴሃ፡ ወገ  
ሰሰቶ፡ ስቡረ፡ አጽመ፡ ዘ  
ባኑ፡ ወአሕየወቶ ❖ ወቀ

ጸበቶ፡ ከመ፡ ይሑር፡ ወ  
ይቁም፡ መንገለ፡ የማነ፡  
ምሥዋዕ፡ ቅሩበ፡ ጎቤሃ ❖  
ተፈሥሐ፡ ጥቀ፡ አንከረ፡  
ወተደመ፡ እምስነ፡ ላህ  
ያ፡ ወእምብርሃን፡ ዘላዕ  
ሌሃ ❖ ወተሐደሰ፡ ርስዕ፡  
ናሁ፡ ወኮነ፡ ወሬዛ፡ ኃያ  
ለ ❖ ወነበረ፡ እንዘ፡ ይትለ  
አክ፡ ውስተ፡ ቤተ፡ ክርስ  
ቲያን፡ ለእግዝእትነ፡ ቅ  
ድስት፡ ድንግል፡ በክልኤ፡  
**ማርያም**፡ ወላዲተ፡ አም

ላክ፡ በኩሉ፡ መዋዕለ፡ ሕ  
ይወቱ፡ ወወስከቶ፡ ዲበ፡  
ዓመታቲሁ፡ ምእተ፡ ወዓ

ሠርተ፡ ዓመተ፡ ወኮነ፡  
ኩሉ፡ መዋዕሊሁ፡ ክል  
ኤቱ፡ ምእት፡ ወሠላሳ፡  
ዓመት፡ ወዕምዝ፡ አዕ  
ረፈ፡ ወፈለሰ፡ ውስተ፡ ሕ  
ይወት፡ ዘለዓለም፡ ጸሎ  
ታ፡ ወበረከታ፡ ወምሕረ  
ተ፡ ፍቁር፡ ወልዳ፡ የሀሉ፡  
ምስለ፡ አመታ፡ ፌቢ  
ን፡ ዳዊት፡ ለዓለመ፡ ዓለ  
ም፡ አሜን፡

.....

ዕብራዊ፡ ብፁዕ፡ ውስተ፡  
ምድረ፡ አክሚም፡ ዘልህ  
ቀ፡ እንዘ፡ ይሴብሕ፡ ስመ  
ኪ፡ ሶበ፡ ሰገደ፡ ወወድቀ፡

ከመ፡ አስተራያኪዮ፡ ቅ  
ድመ፡ ወተናበብኪዮ፡ ጽ  
ድቀ፡ ማርያም፡ አስተር  
እይኒ፡ ኀበ፡ ረሰይኩ፡ ም  
ርፋቀ፡ እስመ፡ ሕሊናየ  
ዘንተ፡ ያስተሕእምም፡ ጥቀ፡

.....